

# BROP GUI TS NE PXEEL PABL LO TIMOTÉ

¡Diuzh Timoté!

<sup>1</sup> Naa nac Pabl, tib zha ne pxeel Jesús nonee Xtiidz Ndzon me lo miech. Íble Dios bzo naa quiaseed naa miech diidz ne rdeed guielmban lo zha ne rzéëb xnëz Jesús.

<sup>2</sup> Laa naa rxel stib guits rii lo luu i gon xin; xin rne naa lo luu sac rzaac naa luu zig tib xpëed naa. Miñe racladz naa ni rnab naa lo Dios men ne nac Pxoz ne, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeeña peet tsienied guic luu.

<sup>3</sup> ¡Gzataa zeeñe rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacnieñ me luu! Dib zdoo naa noxco naa zanal naa miñe rnabey me, zigne bioxcoque grë xmengoldoo naa güeynal zhow.

<sup>4</sup> Zeeñe rsoladz naa blactaa roon luu zeeñe wbi naa i, zoot naa tebaa zha ganniob naa luu stib; zeeña tsonley zdoo naa. <sup>5</sup> Ni rsoladz naa scataa dib zdoo luu rliladz luu Dios; lëëdaaque xnanit luu Loid, ni xniaa luu Eunis, ni nanopaa naa scataque dib zdoo luu rliladz luu me.

<sup>6</sup> Gacxe waa, laa naa rso diidz lo luu pquiin grëse guielbiini ne bneedz Dios lo luu zeeñe pxobnia naa guic luu, ni bnab naa beenlay me luu. ¡Ib csaand luuw! <sup>7</sup> Sac gon, laa Dios rneedz zhiEspíritu me

lo ne, parne sodziebdraa ne, parne diaapraa ne xfuers me, gleyniera ne samiech ne, ni tsabiinira ne. <sup>8</sup> Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu nioogyu naa nu, loxaque ne rliladz naa me. Sinque bloo zdoo luu ne ib laa luu no gan grë guielnë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagoñ rquiin fuerz ne rneedz Dios lo ne. <sup>9</sup> Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuuñ ne, sac haxta zeeñe gard cue guidzliu, laa me psañ diidz ne laa me glu ganle pa lotaa rleynie me ne.

<sup>10</sup> Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne ygaa miech tib guielmban ne gdziind dze lozh, none gliladz zho Xtiidz Ndzon me. <sup>11</sup> Ible min co nagoñ nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca; <sup>12</sup> mincocxe waa znutaa grë ncuaañe nodeed naa. Per ni lalnu ib rtoladzd naa, sac wen wen nañ naa cho nac men ne rliladz naa, ni nañ naa mesi zrieelo yquiaanap me naa nitnëzd naa haxta gal dze ne laa me guiaad.

<sup>13</sup> Bieñ, güeynal grë minę pseed naa luu, sac gon min co nac minę rquiin. Tiblique bliladz Dios, inę bleynie samiech luu zigne no dziuuñ ne ne nac ne zha ne no xnëz Jesús. <sup>14</sup> Espíritu Sant men ne nacnie ne, me yquiaanap luu, me gacnien luu ib

csaand luu zhiwseed Dios, ib csaand luu dziin ne bzo Dios luu gun luu.

<sup>15</sup> Nañlaxe luu gañle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa. <sup>16</sup> Sañgue Onesifr, rnab naa lo Dios yquia zdoo Dios me grë menlidz me, sac blactaa biadchoobladz me zdoo naa. Niicle ne znu nioogyu naa nu, per ib been me ne ntoladz me niaadgañ me naa; <sup>17</sup> sinque zigne blanso me lad guiedz Roma nu, pquiaguib me naa haxta bdziel naa lo me. <sup>18</sup> Ni zoladzaxe luu gañle, pe zhista been me xyudar ne zeeñe no ne guiedz Efés i; rnab naa lo Dios yquia zdoo Dios me gal dze ne laa grëse miech gacredz lo Dios.

## 2

### *Dziits so Timoté lo Xtiidz Dios*

<sup>1</sup> Xin, sañgue luu gon tibaque squi dziits bzo lo Xtiidz Dios, gon gañle Jesús noxco grëse zhizhgab luu.

<sup>2</sup> Grëse miñe gon luu pseed naa miech, scagaa niina bioxco bneew lo zha ne rgobey luu grieelo tsie tsieneew lo stib miech. <sup>3</sup> Ib gacmband luu zeeñe noyan luu grë pe guielñë, sinque bioxco been xtsiñ Jesús zigne no gun luuw, masaque been cuent xmenguiib me nac luu. <sup>4</sup> Sac gon, tib zha ne nac menguiib, grieelod sëëb zho pe stib lo cuent ne nacd xtsiñ menguiib, sac none nsin so zho gun zho tel pe nac miñe rnee men ne rnabey zho. <sup>5</sup> Bioxco been miñe rnee men ne rnabey ne, zig ruñ zha ne rie tib lo wquit; sac zha co telne tsoxcod zho quit zho zigne nacpaa lo wquit, ycaaniad zho premio. <sup>6</sup> Been xtsiñ me zigne no

gaca, zig ruñ zha ne ran; gon̄ ganle zha ne rioxco ran, zha glopaā rquiin guielnzaac ne rac zaatne ran zho. <sup>7</sup> Miñe blozh bzet naa nu, blooniew guic luu, ni Jesúś nac meñ ne gneedz guielbiini lo luu guien luu zha naca.

<sup>8</sup> Tibaque psoladz ganle cho nac Jesúś, zha briequia me lo xtii rey David, ni zha brieeban me; zig nac naa miñ co rzet naa lo miech zeeñe rseed naa zho Xtiidz Ndzon me, par laa zho lo xtol zho.

<sup>9</sup> Ni ne nonecxe naa Diidz Ndzon rii waa, gane nroob guielnë ne noyan naa; zig nac niina, laa naa ngadoo zaatne nioogyu naa nu zootne cho zha dox. Ni niicle ne znu nioogyu naa nu, sangue Xtiidz Dios led yeda nioogyu. <sup>10</sup> Laa naa quiaxecw miñe quiadeedtaa naa, zeeña grëse zha ne bzooblole Dios gliladz Jesúś, grieelo yquiaadiag zho zha laa zho lo dol, ni zha ygaa zho tib guielmban ndzon ne gdziñd dze lozh.

<sup>11</sup> Ni znu gon̄ naca:

Telne xnëzle me no ne zeeñe laa ne guet,  
ib zgaa ne guiobannie ne me.

<sup>12</sup> Niicle nroob guielnë dzian ne porne rliladz ne me,  
scagaa ible zdziñ ne zaatne gnabeynie me ne;  
telne guiab ne runbeyd ne me,  
scaquegaa me ziab me runbeyd me ne.

<sup>13</sup> Niicle telne riaanladz ne me,  
sangue me riaanladzd me ne;  
miñe rnee me ruñ mew, sac mesi rtsëed me xtiidz me.

### *Tsoxco Timoté grieequia xtsiin Timoté*

<sup>14</sup> Bien, beeñcsoladz grë zha bets ne i, zha bzian ne i grë miñ rii. Zig zobwi Dios gañle laa naa rso

diidz lo luu, gudz lo zho t̄ildiidzniedraa zho miech grē godiidz ne paat rquiind; led ncuaanē ndzinlida, loxaque rungüeta guic zha ne rquiaadiaga.

<sup>15</sup> Tibaque bioxco zaacse greeequia xtsiin Dios, miñe noyuñ luu, zeeñä wen greeequia luu zeeñä laa luu gdziñ lo me. Zigne nacse Xtiidz me, sca pseed miecha. <sup>16</sup> Yquiaadiagd luu grē wseed yozh, ncuaanē ni lalnu paat rquiind; zha ne zienal wseed co, zig zie dze laa zho rzozitraa lo Dios. <sup>17</sup> Lega nac zhiwseed zho zig nac grē guielguidzdox; sac tel̄ guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleynie zho, <sup>18</sup> sac tel̄ zha zienaldraa zho miñe nac diidzli; rnee zho bleebanle Dios grē mengut. No palal zha ne rliladzle Xtiidz Dios, zeeñä ron zho miñ co, riendraa zho dien̄ pa miñe gliladz zho. <sup>19</sup> Sangue zha ne nlipaa no xnëz Dios, tsod pe nacne gree zho xnëz me sac lole me ngab zho; zigne zhobneeque lo Xtiidz me zaatne rnee: “Runbey Dios cho nac zha ne nlipaa no xnëz me”; ni rneequew: “Grē zha ne nlipaa ngab xnëz Jesús, none csaan zho grēse guielntseeb.”

<sup>20</sup> Zaatne nac lidz tib zha ricw lëë, no grē xtsiin rotie zho miñe niaa or, miñe niaa plat, ni noquegaa miñe niaa yag, miñe niaa ben̄. Miñe mazdraaniazh, miñ co rquiin zho rio ncuaanē row miech; laa miñe beelze niaa, ga rgo zho ncuaanē row ma. <sup>21</sup> Scaquegaa miech, zeeñä csaan zho grēse ncuaanē paat rquiind, ible squiin zho lo Dios gun zho xtsiin me miñe mazdraan nroob, zigne rquiin grē trast niazh co.

<sup>22</sup> Nac lo guielnguieg, ndal grē ncuaanē ndzinlid

rio guic miech ruŋ zho, sangue luu gon tsienied grë ncuaan co guic luu, bioxco zaacse wban, dib zdoo luu bnalo Dios, iŋe bleynie grëse samiech luu, tilnied luu zho; grë zha ne squi nli mbe zdoo, rbedz zho Dios, zaacse wbannie zho. <sup>23</sup> Ib yquiaadiagd luu grë godiidz ne paat rquiind, sac gon loxaque runctila miech.

<sup>24</sup> Zha ne squi ruŋ xtsiiŋ Dios, nodne tso zho dien pe tildiidz zho; sinque none wen gac zho lo grëse miech. None guien zho zha cseed zho miech; ib guieednied zho miech, <sup>25</sup> ndooladz gac zho gnee zho lo zha ne rlëenie Xtiidz Dios. Ni scagaa Dios cxobnia guic grë zha co, yguudz zdoo zho csaan zho grë xquielntseeb zho, gacnaŋ zho miŋe nac diidzli; <sup>26</sup> zeeŋa tsaa zho biini grieet zho ladzniia meñdox, zaatne ngadoo zho.

### 3

#### *Len dze ne ziaadyob nitlo guidzliu*

<sup>1</sup> Ni none gacnaŋ luu ganle, zeeŋe laa dze ziaady-obpaa nitlo guidzliu, nroob nac guielnë ne gaŋ grë zha ne no xnëz Dios. <sup>2</sup> Zrieequia grë zha ne: gacladz tebaa lose zho yquiin grëtaa ncuaane no, loxaque dimi gleynie zho, niats gac zho, zdaannie zho ncuaane ni rapd zho, zneenë zho Dios, gond zho xtiidz pxoz zho, xtiidz xniaa zho; sacd zdoo zho miŋe gun miech lo zho, laa zho gban zigne notaa guic zho, ib yquiaadiagd zho Xtiidz Dios.  
<sup>3</sup> Gacnaŋdraa zho pe nac guielwleynie, ib yquiaad zdoo zho,

loxaque diidz gzhixcuaa zho,  
 lëbd zho gnabey zho xcuerp zho,  
 sacsi zho samiech zho,  
 stsidil zho grëse ncuaane rquiin,  
<sup>4</sup> zgo zho zha ne ndzieeldiidz zho nia zha ne quiñ  
     zho,  
 ni lalnu guielto tsod lo zho,  
 loxaque dieñ zha gdeed guxt xcuerp zho tso zho,  
     laa ne yguib zho xnëz Dios.

<sup>5</sup> Squiaalo zho ye zho rliladz Dios, per lo grë  
     ncuaane gun zho, ga glu ne rliladzd zho me.  
 Bien, ib ctsieelsad luu grë miech ne sca nac.  
<sup>6</sup> Sac lëe zha ne nacgrë zho ga, rzëëb yu rietsitnie  
     grë wnaa yozh ne zienal ncuaane gdeedtaa guxt  
     xcuerp. <sup>7</sup> Tibaque no zho dieen peraa rseed zho,  
     per ib rioguicd zho miñe nac diidzli. <sup>8</sup> Zigne been  
     chop zha ne biil diidz dox padzeela, Janes grop  
     Jambres, gocndaan zho lo Moisés; scaque run zha  
     co niina, rlëenodox zho miñe nac diidzli. Miech  
     yozha, ndzinlidraa nac guic zho, nacd zho zha ne  
     gliladz Xtiidz Dios; <sup>9</sup> per gacdaquew xtse, zeeñ  
     laa diidz guien ganle pe clas miech nac zho, dzigo  
     lëëque grë ncuaane yozh ne run zho cuee xquielto  
     zho; zigne bzhaacaque zha ne sca blëënie Moisés.

### *Csaand Timoté miñe pseed me*

<sup>10</sup> Sañgue luu, nañle luu ganle zha nac grë miñe  
     pseed naa luu. Wen wen nañ luu ganle zha mban  
     naa, pe no guic naa gun naa, zha dib zdoo naa  
     rliladz naa Dios, zha dib zdoo naa rleynie naa  
     samiech naa, rieednied naa zho. <sup>11</sup> Nañle luu  
     ganle zha rneedz Dios xfuers naa, rlëëb naa grëtaa  
     miñe rteed miech naa, zig been zho naa guiedz

Antioquí, guiedz Icon ni Listr, blactaa pquianal zho naa; per tibaque gocnie Dios naa, psilaa me naa lo grëtaa guielxtseeb co. <sup>12</sup> Ni scagaa naca, grë zha ne rquiabladz gban zigne rnabey Jesú, ible squianal miech zho. <sup>13</sup> Per probsaxe grë zha ne sca quiayuŋtal xtol, zha ne sca noquidie miech, zig zie dze laa zho noteedquie zho nëz ne nitlo zho. Quiaguitnie zho miech, ni quiaguitniegaa menjox zho.

<sup>14</sup> Sangue luu gon, csaand luu grë miñe pseed luu. Nañween luu ganle diidzliw, ni ruŋbeygaa luu cho nac grë zha ne bneew lo luu. <sup>15</sup> Ni stiba, zigne ziadroob luu psilo quiaseed luu Xtiidz Dios, ni lëew bdixbiini guic luu gocnaŋ luu ne Jesú none gliladz miech parne laa zho lo dol. <sup>16</sup> Dib nacse Xtiidz Dios, Espíritu Sant psiaaba guic zha ne pquiaaw, laaw biaan:

rseeda ne miñe nac diidzli,  
rsow diidz lo ne guien ne pa lo quiaxin ne,  
rseeda ne zaacse gban ne.

<sup>17</sup> Zeeŋa sca grëse zha ne no xnëz Dios, grieelo wen wen cseed zho, ni guien zho zha gun zho grëse dziin ne rquiin, dziin ne rieguial zho gun zho.

## 4

### *None gnee Timoté Xtiidz Dios*

<sup>1-2</sup> Zig zobwi Dios, zig zobwi Jesú men ndzon ne rnabey ne, laa naa rso diidz lo luu, bneew Xtiidz Dios lo grëse miech. (Jesú nac men gunquizh miech grëtaa ncuaane beeŋ zho, zigtaa zha ne mbana zigtagaa zha ne gutlew, zeeŋe gdziŋ dze ne laa me guiaad gnabey me.) Bioxco tel pa hortaa bneew lo zho, niicle zeeŋe rzac luu riobda. Bloo

guic zho gliladz zhōw, bnee lo zho zeene gañ luu pe falt ne noyuñ zho, ni scagaa bloonley zdoo zho. Bioxco tibaque pseed zho, ib gueednied luu zho. <sup>3</sup> Sac gon, zdzin dze ne siguieldraa miech yquiaadiag zho miñe nac diidzli; sinque laa zho yquiaaguib zhaase zhaase dieñ cho cseed zho tel pe nac ncuaane rdziladzse zho yquiaadiag zho. <sup>4</sup> Gleynied zho Xtiidz Dios, laa ne yquiaadiag zho miñe nac xtiidz me, lel laa zho tsoxco yquiaadiag zho grë miñe nac zhiwseed miech guidzliu. <sup>5</sup> Sangue luu gon, nsin bzo gdeete luu diidz gungüet zho luu. Zaacse been grë miñe pso Dios luu gun luu, bnee lo miech zha laa zho lo dol; niicle tel pe nactaa guielñë ne noded luu, gacmband luu.

<sup>6</sup> Rien naa ziaadyoble ne laa naa gbi lo guidzliu rii, zhile gdzin dze ne laa zho gut naa. <sup>7</sup> Len ngbidz ne wban naa, tibaque dib zdoo naa bliladz naa Dios; xtsiin mew, laaw ben naa zigne bnabey me naa, ni laaw psiaalgaa naa niina. Zigne runda grë menguiib ne rie lo dil, sca bleeladz naa naa ben naa xtsiin me; <sup>8</sup> laa na nagon, miñe quiambëzse naa nac premio ne no gneedz me lo naa. Lëë premio co gneedz me gal dze ne guiaad me guiaadguñ me guielwxtis; ni led loxaque naadse ygaaw, sinque grëse zha ne rleynie me, grë zha ne dib zdoo quiambëz gdzin dze ne guiaad me stib, grëse zha co ygaa premio co.

### *Tsieniob Timoté*

<sup>9</sup> Bzhiguel guiaadniob luu guiaadgan luu naa nu; <sup>10</sup> sac zig nac Demas, laa me bichele lo naa. Psanque me naa nu laa me zie nëz Tesalónica; sac mazdraa nonie grë ncuaane lo guidzliu rii guic

me. Bay zig nac Crescent, laa me brieet zie me nēz Galás; Tit na, zieegaa nēz Dalmás; laa zho zie zaatne nacle diidz tsie zho. [11-12](#) Niicle Tic guienđ nu, sac laa me pxel naa zie me Efés. Loxaque Lucse biaan lo naa nu.

Psoladz gon tsieguib luu Marcw, zeene laa luu guiaad nēz rii bzhiguiel guiaadnie luu me; sac rquiin me nu gun me xyudar naa lo xtsiin Dios. [13](#) Ni psoladzpa guiaadnie luu lar ne rbiix naa, mine psan naa guiedz Troas lidz Carp; ni guiaadnie luu grē xquits naa. Ib guiaanoladzd luu miñe nac grē guits nroob ga.

[14](#) Tel gan luu ganle nzian ncuaane nonguieldraa been Lejandr naa, men ne nac wncadzguiib ga; per Diostaa nañ zha gunquizh me Lejandr grē miñe been Lejandr ga. [15](#) Ni niicle luugaa gon, nsinaque bzo lo me; sac ne nlipaa rlëenie me wseed ne nolu ne lo miech nu.

[16](#) Zeeñe glopa gocredz naa lo wxtis, choot bzëd nriee xfavor naa, grëse zho biche lo naa; rnab naa lo Dios gunquizhd me zho miñe been zho, sca psaan zho naa. [17](#) Sangue men ndzon ne rnabey ne psaand me naa, me pchoobladz zdoo naa, haxta bdeeda diidz bnee naa Xtiidz me lo grë zha zit rii. Sca gocnien me naa, gun naa cuent role meedz psilaa me naa; [18](#) ni niicle niinagaa, nanle naa ne ib silaa me naa lo grëtaa ncuaane racladz miech cteed zho naa, ni me yquiaanap naa haxta gal dze ne laa me gdzinne naa zaatne rnabey me gbaa. ¡Me rieguial guiaannon gzataa dze, niicle nadzew, gzhew, ni grëragaa len izdoo ne ziaada!

[19](#) Bzhiguiel bdeed tib zhibdiuzh naa lo Aquil i grop Priscil, ni lo grë zha ne no lidz Onesifr.

**20** Gacnaŋ to ganle, laa bets ne Rast biaan Corint, laa Trófimo biaan guiedz Milet, sac rzacnë me.

**21** Bioxco gon guiaadniob luu, zeeŋa blansole luu nēz rii zeene laa mēe nal sēēb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grēragaa zha bets ne, zha bzian ne, zha ne no nēz rii, laa zho rxeel bdiuzh lo luu.

**22** Jesús men ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grëse to!

Pabl

**Diidz ne rdeed guielmban  
New Testament in Zapotec, Mixtepec  
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

**Copyright Information**

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mixtepec

**© 1998, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 11 Nov 2022 from source files  
dated 29 Jan 2022

5317ca58-7555-5e4c-a420-e1e9210e2df2